



*Jumat, 18 September 2020*

**Ogen: Roma 8:28**



**DIBATA ERDAHIN IBAS KAI PE**



**L**a lit si lepas i bas penatap ras pengaturen Dibata i bas doni enda. La lit si jadi la i bas pemetehna. Emaka dikune lit si akap la idah Dibata kerina si jadi i bas doni enda, enda labo payo. Renungenta paksa enda mabai kita ngidah kuga Dibata nerusken dahinNa i bas doni enda. Payo, IA erdahin enem wari nepa doni ras isina dengen pekesahken IA i bas wari pepituken. Janah seh asa genduari Dibata tetap erdahin, guna tetap mpekena-kena doni enda. Janah kita kalak si tek idilo ras iajukna gelah jadi alatna, aronna i bas mpekena-kena doni enda.

Rasul Paulus nuriken maka kecibal doni enda enggo tuhu kelsehen, amin bage anak-anak Dibata arus dengen tetap erpengarapen man baNa. Emaka ipetetapana ukur perpulungen Roma alu ngataken maka Dibata tetap erdahin guna kiniulin man kalak sierkeleng ate man baNa. Kuga kin kalak sierkeleng ate? Erkeleng ate man Tuhan teridah arah erkeleng ate man manusia, kita arus ngelaken keleng ate Dibata e man doni enda dengen ipengasup Dibata kita alu mereken gegeh ras KesahNa. Kita si idilo Dibata e eme kalak si ipilihna arah sura-surana. Ertina, mbelin sura-sura Dibata arah kegeluhenta enda. Dibata erdahin i bas kai pe, ertina kai pe banci ipake Dibata jadi cara guna kiniulin anak-anakNa. La saja arah keriahen, pasu-pasu tapi pe i bas kiniseran, aru ate, persoalen geluh banci ipake Dibata jadi dalam guna kiniulin geluhta. E maka megati lit nge kalak si tek ngakuken nina `enda kepe sura-sura Tuhan man bangku' sengsara membawa nikmat labo nikmat mabai kesengsaran. Emaka perlu kal kita mperdiateken cara Dibata erdahin i bas kegeluhenta, alu bage banci si idah rancangan si mehuli nandangi kerina kecibal geluhta. Tetaplah erpengarapen man baNa i bas kerina kecibal geluhta sabap i bas kerina keadan IA erdahin.